

15 daz selbe klôster hát swarzez leben
und minne, als im got hát geben,
und ist sante Johannis Baptist
houbthêrre dá ân bœsen list.

Der heilege ist sô hôch von art,
20 daz von wîbes lîbe wart
sô heilec man nie geborn.
zwên prophêten úz erkorn,
Jerêmiás und Êsayas,
den zweien wîssagen was
25 kunt wol mêr den hundert jâr
vor Johannis geburte, daz er gar
wart heilec in der muoter sîn.
daz wart wol an dem engel schîn,
der kundet in; daz nieman sah
30 wan Jhêsus sah in, als man jah,
und was ouch ganzlîchen wâr.
der engel bráht die botschaft dar
mit rede úz götlîchem munt.
ez wart gesehen nie diu stunt
35 daz sant Johannes het gemach.
in der wuoste man in sah
gên in sînem kôtzelîn,
der was von hâr der kembelîn
gemachet, sô seit uns diu Schrifte.
40 an im het er anders niht
unde truoc umb in ein seil
von scháfvolle, die er ein teil
het ab den stâden gelesen,
dá ê diu scháf wâren gwesen.
45 hertez leben was im bekant.
sînen kotzen er dô vant
wahsen an dem lîbe sîn.
von gotes kraft er tranc nie wîn
noch bier noch mete noch lûtertranc,

(47^a)

17 immer Johannes. 38 vor har der kæmblîn. 39 Gemachhet,
das zweite h durch Punkte getilgt. 46 dô fehlt.